



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 422
fax. +387 33 726 423
e – mail: info@voda.ba

Broj: **UP-1/21-2-40-103-2/25**

Datum: **14.03.2025. godine**

„Agencija za vodno područje rijeke Save“ Sarajevo rješavajući po zahtjevu Grada Živinice za izdavanje vodne saglasnosti na izrađenu projektnu dokumentaciju za aktivnosti na izgradnji probno-eksploatacionih vodozahvatnih objekata - bunara BBS-1A, BBS-2A, BBS-5, na lokalitetu „Barice“, Grad Živinice, a u svrhu obezbjeđenja nedostajućih količina vode za piće stanovništva i privrede koje se vodom snabdijeva putem javnog vodovodnog sistema, na osnovu člana 109. stav (1) tačka 1. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

RJEŠENJE **o vodnoj saglasnosti**

1. Gradu Živinice daje se vodna saglasnost na izrađenu projektnu dokumentaciju za aktivnost zahvatanja dodatnih količina vode putem probno-eksploatacionih bunara BBS-1A, BBS-2A, BBS-5 koji se planiraju izgraditi na lokalitetu „Barice“, na parcelama označenim kao k.č. br. 670/3, 678/2, 674/2 K.O. Živinice Donje, grad Živinice u skladu sa projektnom dokumentacijom:
 - Glavni projekat izvedenog stanja - Vodovod Barice od bunara BBS-1A, BBS-2A, BBS-5 do PS Barice, Grad Živinice, urađen od strane „Ibis“ d.o.o. Zavidovići, broj: 26IB-G/22.
2. Vodna saglasnost se daje na osnovu utvrđenog činjeničnog stanja i pregleda investiciono-tehničke dokumentacije iz tačke 1. ovog Rješenja koja je sastavni dio ovog rješenja i ista se ovjerena od strane ove Agencije vraća investitoru na trajno čuvanje u skladu sa odredbom člana 114. stav (3) Zakona o vodama.
3. Vodna saglasnost se daje pod slijedećim uslovima:
 - 3.1. Vodozahvatne objekte – bunare BBS-1A, BBS-2A, BBS-5 na izvorišta „Barice“, Grad Živinice sa svim ugradbenim elementima i opremom i dr. izvesti u skladu sa ovjerenom projektnom dokumentacijom iz tačke 1. dispozitiva ovog Rješenja.
 - 3.2. Način i mjesto ugradnje mjerača protoka zahvaćene vode i pumpnih agregata kao i održavanje istih uskladiti sa uputstvima datim od strane proizvođača opreme.
 - 3.3. Obezbijediti ateste za svu opremu koja se planira ugraditi u vodozahvatne objekte, za cjevovod i šahtove (fazonski komadi i armature, vodomjer, pumpni agregati i sl.).
 - 3.4. Korisnik vodne saglasnosti je dužan da riješi imovinsko-pravne odnose na lokalitetu izvođenja radova na mjestu formiranja privremenog gradilišta, pristupnog puta i deponije za odlaganje viška izvađenog materijala.
 - 3.5. U toku izvođenja radova, neophodno je poduzeti sve potrebne mjere zaštite, da predmetnim aktivnostima ne dođe do nastanka štete ili nepovoljnih posljedica po vode i vodni režim.
 - 3.6. Prilikom izvođenja radova treba koristiti opremu i mašine koje su tehnički ispravne, bez curenja tečnih goriva, maziva, hidrauličkih ulja i sl.
 - 3.7. Predvidjeti da se sav nastali otpad prilikom izvođenja radova prikuplja u skladu sa važećim propisima o postupanju sa otpadom.
 - 3.8. Podnosilac zahtjeva je obavezan uvažiti uslove iz Rješenja o urbanističkoj saglasnosti broj:12-04/1-19-015883/22 od 17.08.2022. godine izdato od strane Ministarstva prostornog uređenja i zaštite okolice Tuzlanskog kantona.

- 3.9. Sve kolizije sa postojećim instalacijama (elektroenergetske, telefonske, kanalizacije, i ostale infrastrukture) na lokaciji vodozahvatnih objekata, ukoliko do takvih situacija tokom izvođenja radova dođe, će se rješavati uz saglasnost mjesnog nadležnog preduzeća, koje će dati tehničke uslove za izvođenje ovih radova.
- 3.10. Planom organizacije gradilišta koje će se formirati u funkciji provođenja navedenih radova, treba osigurati da mjesta za smještaj građevinske mehanizacije, tečnih goriva i maziva budu locirana na takvoj udaljenosti da ne mogu imati negativan uticaj na podzemni akvifer (izvorište).
- 3.11. Ukoliko se cisterne i rezervoari s gorivom planiraju postaviti na gradilištu, iste je potrebno postaviti u prihvatne posude ili izvesti s dvostrukom stjenkom prema posebnim propisima i izvan zone uticaja na površinske i podzemne vode.
- 3.12. U okviru gradilišta riješiti prikupljanje i konačnu dispoziciju sanitarno-fekalnih otpadnih voda na način da se iste prikupe u vododržive posude/rezervoare i izvezu izvan zona izvođenja radova uz ugovor sa nadležnim komunalnim preduzećem.
- 3.13. U sklopu uređenja gradilišta dati organizaciju izvođenja radova uz opis i instrukcije u slučaju pojave incidentnih situacija i način sanacije njihovih negativnih posljedica.
- 3.14. Investitor (korisnik vodne saglasnosti) je u obavezi da angažuje stručno lice sa osnovnim zadatkom kontinuiranog nadzora (praćenja i kontrole) nad provođenjem projektovanih aktivnosti na terenu.
- 3.15. Višak materijala iz iskopa koji će se pojaviti prilikom izvođenja zemljanih radova, a koji ne bude iskorišten za radove na izgradnji objekata zahvata potrebno je odložiti na deponiju izvan vodnog dobra, a sve u skladu sa uputama Investitora, tj. korisnika ove vodne saglasnosti.
- 3.16. Tehnologiju izvođenja radova prilagoditi uslovima na terenu uz odgovarajuća osiguranja ljudi i materijalnih dobara i uz praćenje stanja na izvorištu u smislu promjene kvaliteta i količina voda.
- 3.17. Ukoliko se u toku izvođenja radova i korištenja predmetnih objekata prouzrokuju štetne promjene režima voda i to prouzrokuje štete trećim licima, podnosilac zahtjeva je obavezan uzroke štete otkloniti, a nastalu štetu trećim licima nadoknaditi.
- 3.18. Investitor je obavezan pridržavati se svih mjera i uslova, propisanih u ovoj vodnoj saglasnosti i saglasnostima izdatim od strane drugih nadležnih organa.
4. Nakon završetka aktivnosti na terenu neophodno je isti dovesti u prvobitno stanje.
5. U periodu do ishodovanja upotrebne dozvole neophodno je od nadležnog organa iz člana 68. Zakona o vodama donijeti Odluku o zaštiti vodocrpilišta - lokalitet Barice, Grad Živinice, a sve u skladu sa važećim Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta voda za javno vodosnabdijevanje ("Službene novine Federacije BiH", br. 88/12).
6. Po završetku izgradnje predmetnih objekata i obavljenog tehničkog pregleda izvedenih radova, korisnik vodne saglasnosti dužan je podnijeti zahtjev za izdavanje vodne dozvole ukoliko će se moći zahvatiti količina vode iznad 10 l/s, a ako će se zahvatati količina manja od 10 l/s, za izdavanje vodnih akata nadležno je Kantonalno ministarstvo nadležno za vode. Zahtjev se dostavlja u skladu sa članom 12. i 19. Pravilnika o sadržaju, obliku, uslovima, načinu izdavanja i čuvanja vodnih akata („Sl.novine FBiH“ broj: 31/15, 55/19, 41/20, 63/22).
7. Ova vodna saglasnost, shodno članu 114. stav 6. Zakona o vodama, prestaje da važi istekom roka od dvije godine od dana pravosnažnosti ovog Rješenja ukoliko do tog dana nije pribavljeno odobrenje za građenje i započeta izgradnja objekata u skladu sa glavnim projektima iz tačke 1. dispozitiva ovog rješenja.
8. Ovo Rješenje o vodnoj saglasnosti može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Investitor, Grad Živinice pismenim zahtjevom broj: 04/19-19-1765/25 od 06.03.2025. godine zatražio je izdavanje Rješenja o vodnoj saglasnosti na izrađenu projektnu dokumentaciju u cilju utvrđivanja kvalitativno - kvantitativnih karakteristika vode iz bunara BBS-1A, BBS-2A, BBS-5, koji se planiraju izgraditi na parcelama označenim kao k.č. br. 670/3, 678/2, 674/2 K.O. Živinice Donje, grad Živinice, u svrhu obezbjeđenja dodatnih količina vode za piće stanovništva i privrede koje se vodom snabdijeva putem javnog vodovodnog sistema, a u postupku pribavljanja odobrenja za gradnju.

U provedenom postupku, uz zahtjev za izdavanje vodne saglasnosti dostavljena je slijedeća dokumentacija:

A. Opća dokumentacija

- Uvjerenje registraciji poreznog obveznika od 22.07.2019. godine izdato od strane Kantonalnog poreznog uređa u Tuzli - ovjerena kopija,
- Statut Grada Živinice („Sl. glasnik Grada Živinice broj: 5/19, 19/21) - ovjerena kopija,
- Rješenje o izmjenama podataka, broj: 032-0-Reg-22-000067 od 24.01.2022. godine izdat od strane Općinskog suda u Tuzli – kopija,
- Rješenje o urbanističkoj saglasnosti, broj: 12-04/1-19-015883/22 od 17.08.2022. godine izdat od strane Ministarstva prostornog uređenja i zaštite okolice Tuzlanskog kantona – kopija,
- Ugovor o koncesiji, broj: 04-231-1/24 od 13.03.2024. godine potpisan sa Ministarstvom poljoprivrede, šumarstva i vodoprivrede Tuzlanskog kantona – kopija,
- Rješenje o prethodnoj vodnoj saglasnosti, broj: UP-1/21-1-40-142-8/22 od 28.04.2022. godine izdato od strane Agencije za vodno područje rijeke Save, Sarajevo – kopija,
- Dokaz o uplaćenju federalnoj upravnoj pristojbi na zahtjev.

B. Tehnička dokumentacija

- Glavni projekat izvedenog stanja-Vodovod Barice od bunara BBS-1A, BBS-2A, BBS-5 do PS Barice, Grad Živinice, urađen od strane Ibis d.o.o. Zavidovići, broj: 261B-G/22,
- Elaborat o testiranju bunara u grupnom radu na izvoru Barice, Grad Živinice urađen od strane „Geoservis“ d.o.o. Živinice, 2020. godine,
- Elaborat-aktivnosti na puštanju u pogon novog izvorišta „Barice“ u Živinicama u paralelnom radu sa pumpnom stanicom JKP „Vodovod i kanalizacija“-Tuzla, urađen od strane Akvadukt konsalting inženjering Tuzla, decembar 2020. godine.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U provedenom postupku konstatovano je slijedeće:

- Investiciono tehnička dokumentacija navedena u tački 1. dispozitiva Rješenja urađena je u skladu sa uslovima iz rješenja o prethodnoj vodnoj saglasnosti broj: UP-1/21-1-40-142-8/22 od 28.04.2022. godine izdato od strane Agencije za vodno područje rijeke Save, Sarajevo.
- Urbanističko-tehničke uslove za izgradnju vodozahvatnih objekata - bunara, podnosiocu zahtjeva je propisano kroz rješenje o urbanističkoj saglasnosti, broj: 12-04/1-19-015883/22 od 17.08.2022. godine, izdato od strane Ministarstva prostornog uređenja i zaštite okolice Tuzlanskog kantona.
- U periodu do ishodovanja upotrebne dozvole neophodno je od nadležnog organa iz člana 68. Zakona o vodama donijeti Odluku o zaštiti vodocrpilišta „Barice“ tj. probno-eksploatacionih bunara BBS-1A, BBS-2A, BBS-5, na parcelama označenim kao k.č. br. 670/3, 678/2, 674/2 K.O. Živinice Donje, grad Živinice.

Na osnovu dostavljene dokumentacije i utvrđenog činjeničnog stanja, a u cilju smanjenja negativnih uticaja predmetnih objekata i aktivnosti na stanje voda i vodni režim, podnosiocu zahtjeva su ovom vodnom saglasnosti, u dispozitivu Rješenja propisani uslovi u skladu sa članom 114. Zakona o vodama i članom 19. Pravilnika o sadržaju, obliku, uslovima, načinu izdavanja i čuvanja vodnih akata koje je Investitor dužan ispuniti u toku gradnje sistema za zahvatanje novih količina vode za piće.

U skladu sa svim navedenim konstatovano je da sa aspekta sektora voda i priložene dokumentacije ne postoje zapreke da se Investitoru izda tražena vodna saglasnost za navedene aktivnosti, pa je riješeno kao u dispozitivu ovog rješenja.

Podnosilac zahtjeva je uplatio upravnu taksu u iznosu od 60 KM u skladu sa članom 7. stav 1. tarifni broj 43. Zakona o federalnim upravnim taksama („Službene novine F BiH“, broj 6/98, 8/00, 45/10, 43/13).

Uputa o pravnom lijeku

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva u roku od 15 (petnaest) dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Voditelj postupka:

mr. sci. Selma Merdan, dipl.inž.geol.

Prilog: (Ovjerena tehnička dokumentacija navedena pod tačkom B. obrazloženja Rješenja).

Po ovlaštenju
Rukovodilac sektora za izdavanje vodnih akata



Nihad Pezo
Nihad Pezo, dipl.inž.građ.

Dostaviti:

- Grad Živinice
- Ul. Alije Izetbegovića br.28, 75270 Živinice, (prilog),
- ⊕ AVP-ISV -Vodna knjiga,
- Sektor 40, arhiva,
- Oglasna tabla AVP-Sava Sarajevo